

Desember
2010

OVERSTRAND

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445

24 Uur Beheerkamer	028 313 8000/8111
Brandweer	028 312 2400

Bulletin

Amptelike nuusbrieff van Munisipaliteit Overstrand

VERPLIGTE WATERBESPARINGSMAATREËLS IN HERMANUS

ELKE GESPAARDE DRUPPEL IS MORE TWEEKEER SOVEEL WERD

Goeie samewerking en ondersteuning word vanaf die publiek ontvang vir die verpligte waterbesparingsmaatreëls wat in November vir Groter Hermanus bekendgestel is.

Hierdie maatreëls is hoofsaaklik op tuinmaak gerig, waar die grootste besparings behaal kan word, en behels die volgende:

- Natlei van tuine is beperk tot een uur snags tussen 18:00 en 06:00 op gespesifiseerde dae.
- Huishoudings met gelyke straatnommers kan op Maandae en Vrydae natlei.
- Huishoudings met ongelyke straatnommers kan op Dinsdae en Saterdag natlei.
- Tuine moet verkieslik per hand met 'n tuinslang natgelei word, maar outomatiese sprinkelaars is ook aanvaarbaar.
- Uitsonderings kan om geldige redes gemaak word, maar dan moet dit skriftelik deur die kantoor van Hermanus se Area-bestuurder vergun word. Kennis moet ook geneem word dat die sportgronde van die Hermanus Gholfkлуб, die krieketklub en Hoërskool Hermanus besproei word met water wat uit die rioolstelsel herwin is. Hermanus Primêr en die rolbalkklub sal binnekort ook aan hierdie pylypyn gekoppel word.

Hierdie maatreëls sal aan naweekbesoekers 'n billike geleentheid bied om hul tuine nat te lei en is ook meer plooibaar vir mense wat nie op spesifieke tye by hul huise kan wees nie. Hulle maatreëls is nie van toepassing op bona fide kwekerie en eienaars van boorgate wat by die munisipaliteit geregistreer is nie. Navrae kan gerig word aan kantoor van die area-bestuurder in Hermanus by 028 313 8090.

Die was van motors word ook hierdeur geraak en mag slegs met 'n emmer gedoen word.

Ten tye van die afkondiging van hierdie maatreëls het die Burgemeester Nicolette Botha-Guthrie gesê dat daar al 'n geruime tyd kommer bestaan oor die steeds dalende vlak van die De Bos-dam wat die hoofbron van water vir die Hermanus-gebied is. Hoewel daar goed gehoor gegee is aan oproepe om

water spaarsamig te gebruik, was die afgelope paar maande se reënval onvoldoende om dié situasie te verlig.

Boorgatwater word reeds gebruik, maar in die lig van die verwagte toename in vraag gedurende die somervakansieperiode het dit vir die Munisipaliteit Overstrand nodig geword om ooreenkomstig sy bevoegdhede kragtens die Verordening op Water en Sanitasiedienste waterbesparingsmaatreëls vir die Hermanus-gebied af te kondig.

Hierdie maatreëls geld slegs vir die administratiewe gebied van Hermanus, met ander woorde vir alle woonbuurte vanaf Fisherhaven tot by Voëlklip, insluitend Hawston, Vermont, Onrusrivier, Chantclair, Sandbaai, Hemel-en-Aarde Estate, Mount Pleasant, Zwellihle en Hermanus.

Die ander administratiewe gebiede van Overstrand word dus nie deur hierdie maatreëls geraak nie omdat hul waterbronne nog voldoende is.

Die Burgemeester doen 'n beroep op alle inwoners van Hermanus gedoen om hul volle samewerking te gee. Indien dié maatreëls nie doeltreffend is nie, sal daar tot strenger waterbeperkings oorgegaan moet word. Die raad het reeds as deel van die begrotingsproses 'n bykomende heffing van 20 persent op watertarieue goedgekeur sou die dam se vlak onder 40 persent daal en 'n verdere bobelasting van 20 persent sou hierdie vlak onder 20 persent daal.

Die munisipaliteit gaan ook 'n inligtingsveldtog van stapel stuur om waterslim-tuine en die oes van reënwater te bevorder. Elke druppel wat jy vandag bespaar, is more tweekeer soveel werd, het die Burgemeester gesê.

Munisipaliteit Overstrand het oor die afgelope paar jaar reeds aanmerklike vordering gemaak met die implementering van spesifieke intervensies om water te bewaar en die vraag daarna te bestuur. Die munisipaliteit volg sy strategiese implementeringsplan vir die bestuur van die vraag na water en verskeie detailstudies is as deel van die implementering van hierdie plan afgehandel.

BLOUVLAGSTRANDE LÊ EN WAG

Overstrand het sy drie Blouvlag-strande – Grotto, Hawston en Kleinmond – vir die 2010/2011-seisoen behou en Burgemeester Nicolette Botha-Guthrie was op Donderdag 28 Oktober 2010 in Mosselbaai om dié toekenning van die Minister van Omgewingsake, mnr Marthinus van Schalkwyk, te ontvang.

Die oorhandiging het saam met die tiende herdenking van die Blouvlag-program in Suid-Afrika geval. Grotto-strand was van die begin af deel daarvan, hoewel die strand in die eerste jaar slegs loodsprojekstatus geniet het.

"Blouvlag-status gee vir toeriste gemoedsrus oor faktore soos watergehalte, skoon ablusiefasiliteite en veiligheid en dra beslis by tot 'n verhoogde inkomste vir die area. Die beleggings wat ons in Blouvlagstrande maak, is beslis dubbel en dwars die moeite werd", het mev Botha-Guthrie gesê.

Volgens die minister toon toerismesyfers vir die eerste sewe maande van die jaar (in vergelyking met dieselfde tydperk gedurende 2009) 'n toename van 18,1% in buitelandse besoekers. Die syfer is 4,5 miljoen teenoor 3,8 miljoen vir dieselfde tydperk verlede jaar.

Overstrand is gerat vir die groot jaarlikse toestroming van vakansiegangers wat op ons kusdorpe gaan kom ontspan. Meer as 220 000 mense word in die piekperiode tussen

Kersfees en Nuwe Jaar verwag en hoewel dié 'n welkome ekonomiese inspuiting vir die gebied is, gaan dit soos gewoonlik druk op dienslewering plaas.

Daar is hard gewerk om ons gebied vir die vakansie voor te berei, sê Burgemeester Nicolette Botha-Guthrie. In al die administratiewe gebiede is groot getalle tydelike werkers in diens geneem om goeie dienslewering te verseker, ook wat wetstoepassing op ons strande betref.

As 'n vakansiebestemming het Overstrand nie sy gelyke wat die beleving van die natuur en buiteligaktiwiteite betref nie. Vakansiegangers se samewerking gaan egter nodig wees om te verseker dat die seisoen vir almal genotvol gaan wees en dat die dinge wat waarde tot 'n vakansie hier toevoeg vir altyd behoue sal bly.

Daar word 'n beroep gedoen op almal om water en elektrisiteit spaarsamig te gebruik, verkeersveiligheid voor oë te hou en die nodige maatreëls te tref om misdaad hok te slaan.

Honde en bobbejane kan sake onaangenaam maak, en besoekers moet let op die verordeninge wat dié diere se bewegings aan bande lê. Plaas afval in probleemdierebestande vuilblikke en moet ook onder geen omstandighede bobbejane voer nie.

Kontak ons 24 uur-beheerkamer vir enige noodsituasie by tel 028 313 8111. Die tolvrye nommer vir die Ambulansdiens is 10177.

KERSBOODSKAP

Vrede vir almal



Vir almal van ons is die komende Kersseisoen 'n tyd van feestelikeheid en welwillendheid. Dit is asof ons almal hierdie tydjie in die besonder wil gebruik om onself vir 'n wyle van selfsugtigheid te distansieer sodat ons genoeglik tyd saam met ons geliefdes kan verwyf.

Die Kersseisoen is die ideale tyd vir alle inwoners en besoekers om ons lewenstyle in te span as 'n manier om protes aan te teken teen die verval in basiese gemeenskapswaardes. Ons vind inspirasie in die boodskap van die Messias wat lig na 'n wêreld gehul in donkerte gebring het. Hy het gekom om harte vol boosheid in harte gevul met meelewing te verander, om trotse mense konsiderend te maak, en om selfsugtigheid in verantwoordelike teenoor mekaar om te skakel.

Kerstyd is die ideale geleentheid om die waardes te vergestalt wat ons deur ons Morelestandaarde-inisiatief in ons gemeenskap wil laat herleef: betroubaarheid, respek, verantwoordelike, regverdigheid, meelewing en goeie burgerskap en om dit in die nuwe jaar voort te sit.

Mag ons almal 'n vredevolle en geseënde Kerstyd geniet. Mag ons dit teenoor mekaar uitleef sodat ons gemeenskap 'n Vreugdevolle Kersfees kan geniet.

Vrede vir almal!

Nicolette Botha-Guthrie
UITVOERENDE
BURGEMEESTER



SKOONSTE DORP EN ANDER PRYSE

Met ses pryse die afgelope tyd en erkenning van die Verenigde Nasies vir die werk wat die Munisipaliteit Overstrand op die gebied van rampbestuur doen, kan 'n mens tereg sê dat ons op die wenpad is.

Die groot veer in die hoed is die trofee vir die Skoopste Dorp in die Wes-Kaap wat vir die tweede agtereenvolgende jaar Overstrand toe gekom het. Die munisipaliteit het vier keer die afgelope ag jaar as wenner uit die kompetisie getree.

Die uitslag van die nasionale kompetisie van verlede jaar waarin die prysgeld R1 miljoen vir die Skoopste Dorp is, word nog afgewag. Overstrand het vanjaar weer na die eindronde van dié kompetisie deurgedring.

Skaars twee dae tevore, op Dinsdag 12 Oktober, is Overstrand deur die Suid-Afrikaanse Behuisingstigting as die Plaaslike Behuisingsoverheid van die Jaar aangewys. Volgens die sertifikaat kom dié erkenning vir die bekostigbare en omgewingsvriendelike huise en diens van hoë gehalte wat onder moeilike omstandighede aan die gemeenskap gelewer word. Voorts word gemeld dat

plaaslike arbeid en hulpbronne ingespan is om projekte betyds en binne begroting af te handel.

'n Paar weke tevore het die voormalige burgemeester, mnr Theo Beyleveldt, tydens die jaarlikse kongres van die Suid-Afrikaanse Beplanningsinstituut 'n toekenning ontvang vir Overstrand se kontemporêre en veelkantige benadering tot die uitdagings wat stedelike groei bied. Die munisipaliteit se baanbrekerswerk met die opstel van 'n groeibestuurstrategie is daardeur beloon.

By 'n geleentheid wat met die Beplanningskongres saamgeval het, het die Munisipaliteit een van die eerste twee Afrika-stede geword om hul gewig agter die Verenigde Nasies se Wêreldveldtog vir die Vermindering van Ramepe in te gooi. Overstrand het hom sodoende verbind tot die nakoming van 'n tienpuntlys van noodsaaklike stappe om beter weerstand teen omgewingsramp te bied.

In November het die plaveiding van die strate rondom Markplein die streeks- en nasionale toekenning van die Betonvervaardigers-assosiasie (CMA) gekry. Dié toeken-



By die geleentheid waar die Wes-Kaap se Skoopste Dorp aangewys is, was van links mnr Gottlieb Arendse, provinsiale direkteur van vaste afvalbestuur, mnr Anton Bredell, LUK vir Plaaslike Regering, Omgewingsake en Ontwikkelingsbeplanning, me Nicolette Botha-Guthrie, Uitvoerende Burgemeester van Overstrand, Johan van Taak, hoof van vaste afvalbestuur by Overstrand, mnr Rudi Ellis, provinsiale departementshoof, rdl Ben Solomon, lid van Overstrand se Burgemeesterskomitee, en mnr Hanré Blignaut, adjunkdirekteur van ingenieursdiensbeplanning by die Munisipaliteit Overstrand.

nings word elke twee jaar gedoen.

Die Gansbaai-gemeenskapsportsentrum het einde Oktober 'n toekenning van die Mail

and Guardian gekry vir sportontwikkeling as deel van hul Belegging in die Toekomstveldtog.

PARKEERDIENSTE HERRANGSKIK

Meer as 72% van die respondente waarmee daar tydens 'n onlangse meningsopname 'n onderhoud gevoer is, het aangegeef dat hulle hul samewerking en ondersteuning sal verleen vir 'n doeltreffende parkeerstelsel in die Sentrale Sakekern.

Daar word besef dat die meeste dorpe in ons land met 'n soortgelyke infrastruktuur oor 'n parkeerdienst beskik waar daar van motoriste verwag word om vir hul parkeerplek in die SSK te betaal. Hierdie stelsel bied aan almal die geleentheid om parkeerplek te vind, veral waar parkeerruimte beperk is. 'n Gebrekkig parkeerstelsel hou 'n risiko vir handel en toerisme in ons SSK in.

In die lig hiervan is die parkeerdienst wat sedert Augustus 2007 deur Buyambo in die SSK van Hermanus gelewer word onlangs deur Munisipaliteit Overstrand geëvalueer om te bepaal of ons doelwitte behaal word. Tekortkominge is geïdentifiseer en sedertdien werk van gemaak.

Een van die eerste stappe was om Buyambo te versoek om hul parkeerbedieners van 'n herkenbare blou effie te voorsien om verwarring met informele oppassers en munisipale werkers te verhoed sodat motoriste seker kan wees van wie hulle moet betaal.

Elke nuwe stelsel het tyd nodig om tot op 'n punt te ontwikkel waar dit as doeltreffend en bevredigend beskryf kan word. Dit is vir hierdie doel dat die volgende inligting beskikbaar gestel word ten einde die voortgesette ondersteuning van motoriste te verseker:

URE EN AFGEBAKENDE GEBIEDE:

Parkeergelde word tussen 08:00 en 17:00 van Maandag tot Vrydag en tussen 08:00 en 13:00 op Saterdag deur parkeerbedieners gekollekteer. Parkering op Sondag en

godsdienstige vakansiedae is gratis. Die areas wat vir betaalde parkeerplek afgebaken is, kan op die kaart hieronder besigtig word. Betaalde parkeerplek sal ook in hierdie areas met nuwe tweetalige inligtingsborde aangedui word wat die ou tekens sal vervang namate hulle uitgefaseer word.

Gratis parkeerplek: Anders as die afgebakende parkeerplekke, word gratis parkeerplek in areas/strate soos Aberdeen- en Hoopstraat, dele van Marineweg, Paterson-, Royal- en Highstraat asook op Kerkplein toegelaat.

Tariewe: Hermanus het steeds die laagste parkeertariewe van alle gebiede in die Wes-Kaap waar hierdie stelsel in gebruik is. **Die tariewe is onderskeidelik R1.50 vir 30 minute en R3.00 vir 'n uur se parkeerplek op Maandag tot Vrydag en R4.00 per uur op Saterdag.** 'n Aanpassing van hierdie tariewe en bedryfsure mag dalk in die toekoms nodig wees as ons wil hê dat hierdie stelsel die gewenste doeltreffendheidsvlakke moet bereik.

Mense wat 'n parkeerkaart wil koop, kan dit by Buyambo se kantore by Astoria Village in Hoofstraat doen. Hierdie kaart stel mens in staat om tydens bovermelde ure in enige van die afgebakende parkeerplekke te parkeer.

Prosedures: 'n Buyambo Parkeerbediener sal jou voertuig nader wanneer jy in enige van die afgebakende parkeerplekke parkeer en nadat hy of sy vasgestel het vir hoe lank jy wil parkeer, sal hy of sy hierdie inligting op die masjien in sy of haar besit invoer. Jy as motoris het die geleentheid om die betalingstransaksie op die masjien te registreer deur die betaal-knoppe te druk. Nalatig om dit te doen, beteken dat jy jou reg verbeur om die aangegetekende tyd later te bevraagteken. Sou jy later as die toegewese tyd na jou voertuig terugkeer, sal daar van jou verwag word om die verskil te betaal.

Wat word van die geld wat gekollekteer word? Die invoerings wat as betaling geregistreer is, word tussen die Buyambo parkeerbedieners, die diensverskaffer, die stelselverskaffer en die munisipaliteit verdeel.

Wat gebeur met diegene wat bloot wegry sonder om te betaal? Wanneer hulle versuim om te betaal, verkies 'n klein persentasie motoriste steeds om die verkoning te gebruik dat hulle 'nie die parkeerbediener kon sien nie' of 'dat hulle nie daar was toe ek terug kom by my motor nie' of selfs dat 'die parkeerbediener nie kleingeld gehad het' toe hy of sy met R50 of meer vir 30 minute se parkeerplek wou betaal nie. In die toekoms sal hierdie verduidelikings nie aanvaar word nie aangesien dié die motors se verantwoordelikheid is om by die stelsel te hou indien hy of sy in tydens die bedryfsure in die SSK wil parkeer.

Sou jy nie 'vooruit betaal' soos deur die inligtingstekens aangedui nie, sal 'n Buyambo parkeerbediener jou voertuig as geparkeer registreer en van jou verwag om die bedrag te betaal wat by jou terugkeer op die masjien gereflekteer word. Daar sal ooreenkomstig verkeersregulasies met motoriste gehandel word wat nalaat om te betaal.


NEEM ASSEBLIEF KENNIS: Die 'motoroppassers' en 'motorwassers' se dienste hou geensins verband met die parkeerbedieners wat in diens van die Buyambo diensverskaffer is nie.

Wie is hierdie informele bedieners? Tot op hede het verskeie individue hul opwagting in die SSK gemaak en na hulself as 'parkeerbedieners', 'parkeeroppassers', ensovoorts verwys. Hulle staan in der waarheid bekend as 'motorwagte' en 'motorwassers' en kan vanaf 1 Desember 2010 uitgeken word aan hul herkenbare oranje effies waarop die telefoonnommer van hul koördineerder verskyn. Hulle sal slegs in die SSK bedrywig wees.

Motorwagte: Motorwagte mag vrywillige 'footjies' aanvaar om jou voertuig op te pas. Hulle sal slegs tussen 17:00 en 08:00 in die SSK bedrywig wees. Hulle mag nie ook as motorwassers fungeer nie.

Motorwassers: Die mense wat onderneem om jou voertuig te was, het hul eie tarief en mag voertuie slegs tussen 08:00 en 17:00 was en kan slegs in die volgende parkeergebiede hul opwagting maak: Barneys, Bientang se Grot, ENB-parkering, Gearingspunt, Mitchellstraat, Rossi's, Savannah Cafe, Spur/Clicks en Woolworths. Hulle mag nie ook as motorwagte fungeer nie.

Motoriste wat van die dienste van motorwagte en motorwassers gebruik maak, doen dit uit hul eie vrye wil en op hul eie risiko. Die munisipale wetstoepassingsafdeling sal egter hierdie aktiwiteite nougeset monitor. Motoriste moet geen ander persoon as dié wat hierbo vermeld is vir parkeerplek betaal of geld daarvoor gee nie.



SÓ WERK JOU MUNISIPALE REKENING

Met al die vernuwing wat vanjaar in die Munisipaleiteit Overstrand se tariefstruktuur ingevoer is, is daar baie inwoners wat dit moeilik vind om hul maandelikse rekeninge te verstaan.

Met die meegaande ontleding hoop die plaaslike owerheid om sulke probleme uit te skakel. Die impak van die verskillende tariewe en toegewings op u rekening sal duidelik word wanneer u die tabelle bestudeer en u situasie daarmee vergelyk. Hou in gedagte dat BTW nog by die voorbeelde gevoeg moet word.

EIENDOMSBELASTING 1 JULIE 2010 to 30 JUNIE 2011		ONTWIKKELDE ENKEL RESIDENSIELE EIENDOM MET:		
		Grondwaarde van R560 000	Grondwaarde van R3 000	Grondwaarde van R7 000
		Waarde van verbeterings R170 000	Waarde van verbeterings R17 000	Waarde van verbeterings R43 000
		Eiendomswaarde R1 280 000	Eiendomswaarde R20 000	Eiendomswaarde R50 000
Basiese eiendomsbelasting/maand = eiendomswaarde x 0.0031 ÷ 12 (R)		330.67	5.17	12.91
Minus	Residensiële korting 15 000 x 0.0031 ÷ 12	3.87	3.87	3.87
	Korting op verbeterings 35 000 x 0.0031	9.03	1.30	9.04
	20% Korting op verbeterings	63.55	-	-
Plus	HPP-heffing indien van toepassing	25.42	-	-
TOTAAL		279.64	0.00	0.00

EIENDOMSBELASTING 1 JULIE 2010 to 30 JUNIE 2011		ONONTWIKKELDE ENKEL RESIDENSIELE EIENDOM MET:		
		Grondwaarde van R560 000	Grondwaarde van R60 000	Grondwaarde van R7 000
		Geen verbeterings-waarde	Geen verbeterings-waarde	Geen verbeterings-waarde
		Eiendomswaarde R560 000	Eiendomswaarde R60 000	Eiendomswaarde R7 000
Basiese eiendomsbelasting/maand = eiendomswaarde x 0.0031 ÷ 12 (R)		144.67	15.50	1.81
Minus	Residensiële korting 15 000 x 0.0031 ÷ 12	3.87	3.87	1.81
	Korting op verbeterings 35 000 x 0.0031	-	-	-
	20% Korting op verbeterings	-	-	-
Plus	HPP-heffing indien van toepassing	14.08	-	-
TOTAAL		154.88	11.63	0.00

VULLISVERWYDERING 1 JULIE 2010 - 30 JUNIE 2011

ONTWIKKELDE ENKEL RESIDENSIELE EIENDOM MET:	
Een verwydering per week	Twee verwyderings per week
R87.50	R123.00

ELEKTRISITEIT

KATEGORIE	GEBRUIK	PRYS PER EENHEID	KOSTE	BASIESE HEFFING	TOTAAL
Behoeftig	300kWh	0.5762 per eenheid	172.86	142.11	314.97
Enkel fase tot op 60amp: Tweevoudige tarief	1300kWh	0.6949 per unit eenheid	903.37	142.11	1 045.48
	600kWh	0.6949 per unit eenheid	416.94	142.11	559.05
	300kWh	0.6949 per unit eenheid	208.47	142.11	350.58
Enkelvoudige tarief slegs vir voorafbetalende meters (minimum gebruik van 255kWh/maand)	300kWh	1.4089	422.67	-	422.67
	Subekonoms 300kWh	1.2155	364.65	-	364.65

WATER

HUISHOUDINGS: TARIEFSTRUKTUUR	GEBRUIK VAN 8kl/MAAND		GEBRUIK VAN 20kl/MAAND	GEBRUIK VAN 50kl/MAAND	GEBRUIK VAN 70kl/MAAND
Infrastruktuurheffing	7.15		7.15	7.15	7.15
Basiese fooi (RUE)	80.70		80.70	80.70	80.70
Verbruik	0-6kl	0.00	6kl = 0.00	6kl = 0.00	6kl = 0.00
	7-30kl	6.48	2kl = 12.96	14kl = 90.72	24kl = 155.52
	31-60kl	16.2	-	-	30kl = 486.00
	>60kl	21.6	-	-	10kl = 216.00
TOTAAL	100.81		178.57	567.37	945.37

RIOLERING

HEFFINGS	ONTWIKKELDE ENKEL RESIDENSIELE EIENDOM MET GEBRUIK VAN 50kl 25kl 15kl			ONTWIKKELDE ENKEL RESIDENSIELE EIENDOM MET SEPTIESE TENK	ONONTWIKKELDE ENKEL RESIDENSIELE EIENDOM WAT AAN RIOLERING KAN KOPPEL	ONONTWIKKELDE ENKEL RESIDENSIELE EIENDOM WAT AAN NIE RIOLERING KAN KOPPEL NIE
Basies	79.80	79.80	79.80	54.00	170.00	54.00
Infrastruktuur	8.99	8.99	8.99	8.99	8.99	8.99
Watergebruik (70% x R8.55)	299.25	149.63	89.78	-	-	-
Tenkediens	-	-	-	R370 of R740 na 15:00 op woensdae	-	-
TOTAL	316.22	238.42	178.57	62.99 (Tenkediens uitgesluit)	178.99	62.99



STAAT

VIR ALLE REKENING NAVRAE KONTAK ASB.
DIE ADMIN. WASTE AAN U.
DEBITEUR BTW REG. NR.

Rekening Nummer:

Datum van Staat: 29/09/2010	Kwitanties tot: 28/09/2010
Waardasie Grond: 690000	Waardasie Geboue: 2029600
Voorafbetalende meter Nr:	

Naam / Name:

Ligging adres / Site address:

BELASTING FAKTUUR: 2908459

MAANDELIKSE REKENING VIR: SEPTEMBER

Diens Dep: 600.00	Erf Nr:	Oorhandig:	Ooreenkoms:
Anders Dep:	Voorstad: HSB	Bedrag:	Bedrag:

METER READINGS / METER LESINGS

DIENS	METER N.	VORIGE LESING	HUIDIGE LESING	VERBRUIK	PERIODE	DAG GEMIDDELD
W E	0000079773 0000054740	13108 55697	13145 57511	37 1814	04/08-30/08 04/08-30/08	1.42 69.76

DETAILS / BESONDERHEDE

BESKRYWING				VERBRUIK	BEDRAG	BTW	BEDRAG BTW IN.
saldo oorgedra: Kwitanties: 0000014328							3375.56 3375.55-
BELASTINGS RES							551.73
WATER INFRASTRUKTUR				1	7.15	1.00	8.15
WATER RUE				1	80.70	11.30	92.00
WATER FREE				5.128			
WATER 7 - 30 KL				20.515	132.93	18.61	151.54
WATER 30 - 60 KL				11.356	183.96	25.75	209.71
ELECT/ELEK BASIC/BASIES				1	142.10	19.89	161.99
ELECT/ELEK CONSP/VERB				1814	1260.54	176.48	1437.02
SEWER BASIC/BASIES				1	70.00	9.80	79.80
REFUSE MONTH/MAAND				1	107.89	15.10	122.99
INFRASTRUKTUR				1	7.89	1.10	8.99
RIOOL MAANDELIKS SETA1				25.900	194.25	27.20	221.45

'N INSPIRERENDE BLIK OP DIE TOEKOMS

Die inhuulding van die 30 lede van die sewende junior raad van Overstrand op Donderdag 21 Oktober 2010 was vir Uitvoerende Burgemeester Nicolette Botha-Guthrie 'n inspirerende blik op die toekoms.

"Die kaliber leierskap waarmee ons hier te make het, maak my met reg trots en opgewonde," het sy gesê en bygevoeg dat sy nog altyd geglo het dat jongmense 'n belangrike en dikwels onderbenutte bron van vaardighede, energie, kreatiwiteit en visie vir gemeenskappe is. "Ek is bly dat ons in Overstrand voordeel uit hierdie bron kan put."

Die 2010/11 Junior Burgemeester, Lungisa Qendu, het haar woorde beaam deur te belooft dat hy en sy mederaadslede hul uiterste bes gaan doen om 'n verskil in hul gemeenskappe te maak. Hy het bygevoeg dat om junior raadslede te wees, baie vir hulle as jongmense beteken want hierdie geleentheid gaan in die toekoms vir hulle baie deure as jong leiers open.

Alhoewel mev Botha-Guthrie by hierdie geleentheid in haar hoedanigheid as burgemeester opgetree het, het sy al die vorige inhuuldings as gas bygewoon. Sy het die Enlighten Education Trust onder wie se bestuur die Junior Raad stewig op koers geplaas is, bedank asook mnr Theo de Wet wat plegtiggetrou vir baie jare reeds as bestuurder van die junior stadsraad fungeer.

"Daar is heelwat breinkrag daaraan bestee om die regte plek vir die junior raadslede in hul onderskeie skoolomgewings te vind sodat hulle 'n betekenisvolle leierskapsrol kan vervul, 'n rol wat ten volle geïntegreer is by die stelsel van verteenwoordigende leerlingra-



By die inhuulding van die 2010/11 Overstrand Junior Raad was voor van links Sivenathi Nyongo, Anita Mfiki, Abenathi Ndwana, Christiaan Kriegler, Lungisa Qendu (Junior Burgemeester), Theo de Wet (Bestuurder Junior Raad), Uitvoerende Burgemeester Nicolette Botha-Guthrie, Fanie Krige (Kommunikasiebestuurder) Jonwin Bassolati (Junior Onderburgemeester), Tegan Green (Junior Speaker), Daniëlle Krige, Codene Pretorius en Asipe Mqhwai. Staande agter is van links Dikeleli Fuma, Vuyiswa Ngaphi, Joudene Philander, Eben van der Heide, Lorenzo van Schalkwyk, Unathi Maneli, Ricardo Tobias, Sarel Naudé, Zander Holtzhausen, Masibulele Joni, Te'gan Dean, Bianca Huysamen, Marni van der Westhuizen, Julianne Pheiffer, Andrea Albertyn, Ian Cornelius, Abigail Swartz, Faeeda Moos en Ebermuscka Newham.

de," hetsy gesê.

"As Munisipaliteit Overstrand staan ons bankvas agter die visie dat hierdie liggaam allereerste opvoeding ten doel het en dat julle moet leer terwyl julle lei. Van ons kant af gaan ons aan julle al die nodige ondersteuning bied sodat julle goed kan presteer," het Botha-Guthrie gesê voordat sy die jongmense daaraan herinner het dat die voordeel wat hulle hieruit gaan trek, net sover strek as hul bereidwilligheid om ten volle van hierdie geleentheid gebruik te maak.

Die Junior Raad is saamgestel om so verteenwoordigend moontlik te wees van al

Overstrand se geografiese gebiede en gemeenskappe. Benewens Qendu, wat uit Zwelihle afkomstig is, word die ander uitvoerende poste gevul deur Jonwin Bassolati, Junior Onderburgemeester en verteenwoordiger van Hawston en Mount Pleasant, Tegan Green, Junior Speaker en Stanford-verteenwoordiger, Christiaan Kriegler, Hermanus-verteenwoordiger, Daniëlle Krige, Kleinmond-verteenwoordiger, en Abenathi Ndwana, Gansbaai-verteenwoordiger.

Die res van die Junior Raad bestaan uit die volgende verteenwoordigers:

Hawston Sekondêre Skool: Andrea

Albertyn, Codene Pretorius, Eben van der Heide, Julianne Pheiffer, Abigail Swartz, Chrisna Witbooi en Ebermuscka Newham;

Hermanus Hoërskool: Lorenzo van Schalkwyk, Bianca Huysamen, Ian Cornelius en Marni van der Westhuizen;

Qhayiya Sekondêre Skool: Masibulele Joni, Dikeleli Fuma, Anita Mfiki, Sivenathi Nyongo, Vuyiswa Ngaphi en Unathi Maneli;

Gansbaai Academia: Jolene Philander, Ricardo Tobias, Zander Holtzhausen, Sarel Naudé en Asipe Mqhwai; en

North Cliff House College: Faeeda Moos en Te'gan Dean.



OP ONS VERHOOG

In die loop van die volgende paar weke het OAK heelwat waarin ons ondersteuners en vakansiegangers hulle kan verlustig! Op Sondag, 5 Desember om 15:30 is die alombekende WILNA SNYMAN in Dear Mrs Steyn in die Auditorium te sien. Op Donderdag, 16 Desember gaan 'n

KERSKONSERT gehou word. TRUE VOICES (foto) gaan Kersliedjies sing met tussenspel deur Barry Smith agter die orrel. Hierdie konsert word om 19:00 in die NG-kerk gehou. Op Woensdag, 5 Januarie 2011 om 19:00 betree Marga van Rooy die verhoog om ons met die Afrikaanse komedies AI MERAAL en BRUIDJIE DIT EN BRUIDJIE DOT te vermaak. Op Saterdag, 8 Januarie maak die briljante pianis, GUSTAVO ROMERO, uit Amerika weer eens sy buiging in die Auditorium om 19:00. Bespreek by BELLINI in Hermanus by 028 312 4988 of kontak René du Plooy by 082 940 4238 vir verdere navrae.

Kantoorure min geraak in feesdae

Met die openbare vakansiedae wat hoofsaaklik oor naweke val, gaan munisipale kantore nie veel ontwrig word gedurende die komende vakansieperiode nie.

Buiten op dié vakansiedae, sal munisipale kantore, insluitende biblioteke, slegs op Vrydag 24 Desember 2010 en Vrydag 31 Desember 2010 om 13:00 sluit en op die eerste werksdag daarna om 07:45 weer vir werksaamhede heropen. Essensiële dienste sal deurlopend gelewer word.

VUURWERKOORTREDERS GAAN VASGEVAT WORD

Soos elders in die land is Overstrand se munisipale wets-toepassers op 'n gereedheidsgrondslag om saam met die polisie die onwettige gebruik en verkope van vuurwerke hok te slaan.

So sê die munisipale wetstoepassingshoof, mnr Marius Hendriks, in sy kommentaar op berigte dat polisiestasies opdrag gegee is om te verseker dat die wette en munisipale regulasies rakende die verkoop en gebruik van vuurwerke toegepas word.

Dit volg op kommer wat deur diereliefhebbers uitgespreek is oor die geneigdheid by mense om in vakansietye vuurwerke af te vuur.

Die verkope en gebruik van plofstof word beheer deur die Wet op Plofstof van 1956, wat aanvoer dat die onwettig is om vuurwerke te gebruik:

- binne 500 m vanaf enige plek wat plofstof berg of vervaardig, petroleumdepot of 'n gashouer;
- in enige gebou of publieke deurgang;
- in enige ander publieke plek of oord, behalwe as daar vooraf geskrewe toestemming van plaaslike owerhede verkry is.

Geen vuurwerke mag deur 'n straatverkoper of verkoper by 'n vlooiemark, uit 'n kattedak of sleepwa of uit 'n spazawinkel verkoop word nie. Slegs groot- en kleinhandelaars wat kragtens die Wet op Plofstof gelisensieer is en

in besit is van 'n geldige lisensie wat deur die hoof-inspekteur van plofstowwe uitgereik is, mag vuurwerke verkoop.

Indien 'n persoon skuldig bevind word van die besit van vuurwerke kan hy 'n boete van R600 of 12 maande tronkstraf ontvang.

"Diere se veiligheid is ook 'n groot kommer. Die gebruik van vuurwerke, veral waar 'n erf toegebou is, het al in die verlede daartoe gelei dat diere ernstig beseer is aangesien hulle probeer weghardloop of wegkruip van die geraas," het Hendriks gesê.

Afdelingshoof van Overstrand-brandweer in Hermanus, Joe Schoeman, het die aandaag op die Verordening op Gemeenskapsbrandveiligheid gevestig wat bepaal dat niemand vuurwerke binne 'n munisipale gebied mag afvuur sonder dat hy of sy skriftelike aansoek by die Brandweerhoof gedoen en die aansoek behoorlik gemotiveer het nie.

Hy voeg by dat die eienaar van die perseel waarvan 'n vuurwerk afgeskiet is as die oortreder geag sal word totdat die teendeel bewys kan word.

Vuurwerke mag op Oujaarsaand (31 Desember) vanaf 22:00 tot 01:00

by die volgende plekke afgevuur word: Grotto-strand (Oos van die Blouvlagstrand), Hawston-Hawe en strand, Uilenkraalsmondstrand, Stanfordsbaaistrand en Kleinmondstrand.

DO YOU PREFER THIS NEWSLETTER IN ANOTHER OFFICIAL LANGUAGE?
SMS your account number with E for English to **082 338 1631**

UNGATHANDA LENCWADI YESAZISO-NDABA IBHALWE NGOLUNYE ULWIMI?
Thumela i-SMS enenombolo ye-akhawunti yakho kunye no X omele isi Xhosa kule nombolo **082 338 1631**

